




*Sabtu, 10 Oktober 2020*  
**Ogen: Mazmur 62:6-8**



**Pengarapenku Man Dibata**



**M**baru enda lit sekalak designer terkenal gelarna jadi Asha, siertina *arapen*. Nina, maka gantina gelarna e perban nggo datca kemalemen ate ras keriahen ban nggo turah pengarapenna. Penting kepe pengarapen e bas kegeluhen manusia. Pengarapen erbahanca lit perayakenta bas ndahiken wari-warinta ,pengarapen mahanca turah lalap ukur si mehuli, pengarapen banci ka mereken gegeh man banta alu la si sedari. Pengarapen i bas cakap Junani eme *elpis* siertina nimai si mehuli, adi bas cakap Ibrani eme *miqveh* ertina tuhu-tuhu nimai, mpepulung. Jadi labo sekedar nimai tapi lit sada penjemba i bas nimai e, mahanca la kita kem, tapi janah nimai e lit si lakoken aksi ntah tindakan guna erbahanca siniarapkan kita e jadi. Emaka adi kalak si erpengarapen labo ia sinik ntah kem, tapi aktif ras lit usahana, iupayakenna erbage cara guna seh ku bas tujun si niarapkenna ndai.

Enggo 63 tahun Moria GBKP mpeturah pengarapen, jadi ingan cio man nande ras diberu i bas Gerejanta enda. Ise kin Moria e? Kam ras aku. Mari jadi moria si erpengarapen man Dibata saja, alu makeken persadan Moria jadi inganta secara aktif ndarami Dibata ras kebenaranNa. Sabap pemazmur pe ngatakenca i bas Dibata lit ketenengen ras pengarapen. Si enda ikataken pemasmur erkiteken enggo inanamina penampat Dibata man bana tupung ijadikenna Dibata ingan cicio si aman. Ipelimbarui Dibata gegehna, paguh ibahan Dibata nahena, emaka ngasup ngalaken kerina musuhna. Ibereken Dibata kemenangen man kalak si ernalem man baNa. Kesaksin pemasmur enda iturikenna man kerina Moria GBKP, gelah tetap njadikan Dibata ingan cicio si aman, ngendesken geluhta man Tuhan suari ras berngi, ras lalap nuriken kerina isi pusuh man baNa sabap IA ngasup mereken dalan, ras serpang puluh. Labo pediat Dibata si erpengarapen man baNa nggeluh bas kesuahen ras lalap. Dalanta ngendesken diri man baNa eme arah pertotonta teptep wari. I je me kita ercakup, i je me kita nuri-nuri, i je me si turiken isi pusuhna. Arah ertoto si kataken maka kita la megegeh adi la ras Tuhan. Janah kita ertoto si timai alu saber si mehuli i bas Tuhan nari.